

**17 OCTOMBRIE**

**RUGACIUNEA 1**

**SF.CUVIOASE**

**ALIPIA AVDEEVA DE LA PECERSKA**

**Молитва**

О преблаженная и всечестная наша мати Алипие, Лавры Киево-Печерския похвало, красото и радование, великая о нас молитвеннице, усердно к тебе прибегаем и с сокрушенным сердцем просим: моли Спасителя нашего Господа Иисуса Христа и Пресвятую Владычицу нашу Богородицу во еже избавитися нам от многоразличных духовных и плотских недугов, болезней. Да подаст нам Господь прощение согрешений наших и стяжати благодать Духа Святаго, Господа Животворящаго, во вспоможение брани на невидимыя и видимыя враги наша. О таиннице чудная! Простри молитву твою к Престолу Всевышняго, да избавит нас Владыка мира от ада преисподняго, от волков мысленных, многоразличных зол и бед. О преподобная мати Алипие, и по смерти не остави чада твоя, от всех концев страны тобою собранныя, и избави я от

всякого навета вражия. Ум наш озари светом лица Божия, укрепи благодатию Господнею жизнь нашу, да в законе Его утвердившися, неленостно пойдём по пути заповедей святых. Осени своим матерним благословением нас всех в скорбех и печалех сущих, болезнями душевными и телесными одержимых. Испроси нам свыше дух кротости, терпения и любви, мудрости и покаяния. Отступившия от Православныя веры и погибельными ересьми и расколами ослепленныя вразуми. В супружестве живущим буди любви и мира подательнице, младенцем крепкое и доброе возрастание, отроком и отроковицам в учении помощница и ума прибавление. Юным - наставнице и надежная хранительнице чистоты и целомудрия. Старым седином - добрая опора и мудрость. Странствующим - от внезапныя смерти избавление. В темницах заключенным — скорое от уз разрешение. Да низпослет нам Господь твоими молитвами, мати Алипие, труд полезный по сердцу нашему. В житейских делах буди нам мудрая советодательнице. Жилищам нашим хранительнице крепкая и надежная. Нищим и неимущим - щедрая и богатая милостыни подательнице. Всем нам крепко веру Православную хранить, в любви друг ко другу пребывать, память твою чтити и за все Бога хвалити ныне и присно и во веки веков. Аминь.